

आकाशवाणी

खबरां विजय बजाज कोला,

पैहले खास-खास खबरां:-

1. लद्दाख ते जम्मू-कश्मीर दे दूर-दरेडे ते बर्फबारी करी प्रभावत इलाकें च अज्जै थमां मरदमशुमारी दे पैहले गेड़ तैहत आपू अपनी गिनतरी दर्ज करने दी प्रक्रिया शुरू होआ करदी ऐ ते एह 31 अगस्त धोड़ी जारी रौहग।
2. म्तेहानें सरबंधी राश्ट्री एजेंसी NTA ने UGC-NET दे म्तेहान लेई त्रै विशें- English, Commerce ते Sociology लेई परतियै म्तेहान कराने दा ऐलान कीता ऐ।
3. झारखंड च JPSC ते JSSC विद्यार्थियें दा विरोध-प्रदर्शन 24में ध्याड़े जारी -म्तेहानें च गड़बडियें गी लेइयै प्रदर्शन करा'रदे छात्रें रांची च मुखमंत्री हेमंत सोरेन, कांग्रेस नेता राहुल गांधी ते RJD नेता तेजस्वी यादव हुंदे पुतले फूके।
4. मौसम विभाग नै अज्ज ओडीशा ते पच्छिम बंगाल दे गंगा कन्नै लग्गदे इलाकें च मौलेधार बरखा बरने दी रेड अलर्ट आली चेतावनी जारी कीती ऐ।
5. पुंछ जिले च प्राचीन श्री बाबा बुड्डा अमरनाथ मंदर लेई 12एं दिनें दी सालाना श्री बुड्डा अमरनाथ यात्रा अज्ज बड्डलै सख्त सुरक्षा बंदोबस्तें हेठ शुरू।
6. नमीं दिल्ली दे इंदिरा गांधी इंडोर स्टेडियम च अज्जै थमां BWF बैडमिंटन विश्व चैम्पियनशीप शुरू होआ रदी ऐ।

<><><><><><>

ते हून खबरा विस्तार कन्नै:-



JK -Ladakh Census

लद्दाख ते जम्मू-कश्मीर दे दूर-दरेडे ते बर्फबारी करी प्रभावत इलाकें च अज्जै थमां मरदमशुमारी दे पैहले गेड़ तैहत आंपू अपनी गिनतरी दर्ज करने दी प्रक्रिया शुरू होआ करदी ऐ ते एह 31 अगस्त धोड़ी जारी रौहग। जम्मू-कश्मीर ते लद्दाख लेई मरदमशुमारी सरबंधी मैहकमे दे डरैक्टर अमित शर्मा होरें दस्सेआ ऐ जे इस प्रक्रिया दे तैहत बसनीकें गी पैहली थमां 30 सितम्बर धोड़ी घर-घर जाइयै कीती जाने आली आबादी दी गिनतरी शा पैहले डिजिटल ढंगगै नै अपनी जानकारी देने दा मौका मिलोग। उ'नें दस्सेआ जे जम्मू-कश्मीर ते लद्दाख दे एकड़े इलाकें दी भूलौगिल स्थिति गी दिक्खदे होई एह बशेश बवस्था कीती गई ऐ। जम्मू-कश्मीर दे केंई इलाकें च स्यालें दरान भारी बर्फबारी करी केंई दिनें धोड़ी उत्थे पुज्जना बी औक्खा होई जंदा ऐ। इस्सै गी ध्याना च रक्खदे होई गें इनें इलाकें च मरदमशुमारी दा कार्यक्रम देसै दे बाकी हिस्सैं शा पैहले रक्खेआ गेआ ऐ।



NTA-Retest

म्तेहानें सरबंधी राश्ट्री एजेंसी NTA ने UGC-NET दे म्तेहान लेई त्रै विशें- English, Commerce ते Sociology लेई परतियै म्तेहान कराने दा ऐलान कीता ऐ। इनें त्रौनें विशें च पेपर च केंई चाल्ली दी त्रुटें दिआं शकैतां हासल होने परैन्त एह फऐसला लैता गेआ ऐ। NTA नै दस्सआ ऐ जे अंग्रेजी विशे दा परतियै म्तेहान औंदी 9 सितम्बर गी बड्डलै 9 बजे थमां दपैहरी 12 बजे तगर पैहली शिफ्ट च जिसले के Commerce विशे दा म्तेहान बी उस्सै दिन दपैहरी 3 बजे थमां संजा 6 बजे तगर दुई शिफ्ट च लैता

जाहग। एहदे परैन्त Sociology विशे दा पेपर 10 सितम्बर गी बड्डलै 9 बजे शा दपैहरी 12 बजे तगर पैहली शिफ्ट च लैता जाना तय होआ ऐ। NTA ने UGC नेट दा म्तेहान 22 थमां 30 जून मझाटै 87एं विशें लेई आयोजित कीता हा।

<><><><><><>

Air India Flights

एयर इंडिया ने आखेआ ऐ जे विशाखापत्तनम आने-जाने आली ओहदियें सब्भनैं डोआरियें दा संचालन अज्जै कोला भोगपुरम दे नमें अल्लूरी सीताराम राजू अंतराष्ट्री ब्हाई अड्डे थमां होग। एहदे लेई मौजूदा एयरपोर्ट कोड VTZ दा गै इस्तेमाल कीता जाहग। इक प्रेस रिलीज च एयर इंडिया ने दस्सेआ ऐ जे भोगपुरम ते दिल्ली बश्कार हर हफ्ते 14 डौआरियां होगंन। 70 ज्हार 342 वर्ग मीटर च फैले दे इस नमें टर्मिनल शा यात्रियें गी बाद्दू सुविधां थहोगंन ते परिचालन समर्थ बी बधोग। भोगपुरम ब्हाई अड्डे पर 22 चेक-इन-काउंटर, 18 सेल्फ-बैगेज ड्रॉप यूनिट, एडवांस्ड स्क्रीनिंग सिस्टम, समेयान सांभने दी आधुनिक सुविधां ते 7 एयरोब्रिज बी उपलब्ध न ।

. <><><><><><>

Jharkhand Students Protest

झारखंड च JPSC ते JSSC विद्यार्थियें दा विरोध-प्रदर्शन 24में ध्याड़े च दाखल होई गेआ ऐ। म्तेहानें च गड़बडियें गी लेइयै प्रदर्शन करा'रदे विद्यार्थियें रांची च मुखमंत्री हेमंत सोरेन, कांग्रेस नेता राहुल गांधी ते RJD नेता तेजस्वी यादव हुंदे पुतले फूके। छात्रें राज्य सरकार दे खिलाफ नारे लाए ते भर्ती प्रक्रिया च गड़बडियें दा आरोप लांदे होई JSSC म्तेहानें गी रद्द करने दी फही मंग कीती ऐ। प्रदर्शनकारियें 20 अगस्त गी मुखमंत्री

आवास दा घेराव करने दी योजना दी बी घोशणा कीती ऐ। तोंआई राज्य सरकार ने गल्लबात दे जरिए समस्या दा समाधान करने दा इक होर जतन कीता ऐ ते प्रदर्शनकारी विद्यार्थियें गी अज्ज दपैहरी 2 बजे गल्लबात लेई साद्दा दिता ऐ।

<><><><><><>

Weather

मौसम विभाग नै अज्ज ओडीशा ते पच्छिम बंगाल दे गंगा कन्नै लग्गदे इलाकें च मौलेधार बरखा बरने दी रेड अलर्ट आली चेतावनी जारी कीती ऐ। एहदे इलावा छत्तीसगढ़- पूर्वी मध्य प्रदेश- उत्तर प्रदेश ते उत्तराखंड लेई अज्ज भारी बरखा दा ऑरेंज अलर्ट ऐ। आंध्र प्रदेश- गुजरात- हिमाचल प्रदेश- कोंकण- गोवा- मध्य महाराष्ट्र- मराठवाड़ा ते उत्तर पूर्वी भारत दे किश हिस्सें च बी भारी बरखा दे असार न। मौसम विभाग ने अज्ज जम्मू-कश्मीर- बिहार- झारखंड- कर्नाटक ते ओडीशा च बिजली मिलने ते तेज ब्हाएं दे कन्नै बदल गरजने दी संभावना दस्सी ऐ। एहदे इलावा तमिलनाडू- पुदुचेरी, कराईकल, आंध्र प्रदेश, तेलंगाना ते अंडमान ते निकोबार टापुएं च बी अज्ज इस्सै चाल्ली दा मौसम बने दे रौहने दी मेद ऐ।

<><><><><><>

Shri Buddha Amarnath Yatra

पुंछ जिले च प्राचीन श्री बाबा बुड्डा अमरनाथ मंदर लेई 12एं दिनें दी सालाना श्री बुड्डा अमरनाथ यात्रा अज्ज बड्डलै सख्त सुरक्षा बंदोबस्ते कन्नै शुरु होई गेई। उपराज्यपाल मनोज सिन्हा होरें सख्त सुरक्षा बंदोबस्ते हेठ जम्मू दे भगवती नगर यात्री निवास थमां श्रद्धालुएं दे पैहले जत्थे गी झंडी दस्सियै रवाना कीता। एह यात्रा 28

अगस्त तगर चलोग ते रक्षाबंधन दे मौके पर खत्म होग। अधिकारिणं राजौरी- पुंछ ते यात्रा आहले रस्तें पर सख्त बहु-स्तरी ते निगरानी कायम कीती दी ऐ। एह हिंदू तीर्थयात्रा हर बरे सौन महीने दौरान होंदी ऐ ते यात्री पुंछ जिले दी मंडी तहसील दे राजपुरा गां च स्थित भगवान शिव गी समर्पित प्राचीन श्री बाबा बुड्डा अमरनाथ मंदर च दर्शन करने गी पुज्जदे न।

<><><><><><>

Badminton

नमीं दिल्ली दे इंडिरा गांधी इंडोर स्टेडियम च अज्जै थमां BWF बैडमिंटन विश्व चैम्पियनशिप शुरु होआ रदी ऐ। भारती खड्गदारी अज्ज इस प्रतियोगिता दे पैहले ध्याड़े अपने अभियान दी शुरुआत करडन। महिलाएं दे सिंगल्स च पूर्व विश्व चैम्पियन ते 9में नम्बरै दी खड्गदारन पी.वी सिंधु दा मुकाबला आयरलैंड दी सोफिया नोबल कन्नै होग। दुई बकखी महिलाएं दे डबल्स च ट्रीसा जॉली ते गायत्री गोपीचंद दी जोड़ी पैहले दौर च स्पेन दी पाउला लोपेज़ ते लूसिया रोड्रिगेज़ कन्नै मुकाबला करोग।

भारत दे आयूष शेटी दा मुकाबला दुनिया दे नम्बर इक खड्गदारी ते मजूदा चैम्पियन चीन दे शी यू-क्यूई कन्नै होग। मर्दे दे डबल्स च 5में नम्बरै आली भारती जोड़ी सात्विक साईराज रंकी रेड्डी ते चिराग शेटी गी Bye मिलने दे बाद ओह सिद्धे दुए दौर च पुज्जी गे न। भारत दे एम.आर. अर्जुन ते हरिहरण अमसा-करुनन दी जोड़ी दा मुकाबला आयरलैंड दे स्काट गिलडिया ते पॉल रेनॉल्डस कन्नै होग।

<><><><><><>

Cricket

मर्दे दे टेस्ट क्रिकेट च श्रीलंका ते भारत बश्कर गॉले च खेड्ढे जाऱदे मजूदा श्रंखला दे पैहले मैच दे अज्ज त्रीये दिन भारत अपने कल्लै दे स्कोर 460 रन्जें शा अग्गे खेड्ढना शुरु करोग। भारत लेई देवदूत पडीकल ने 167 रन्ज- के.एल. राहुल ने 22 रन्ज ते ध्रुव जुरेल ने 51 रन्ज बनाए न। कल दिनै दा खेड्ढ मुक्कने धोड़ी प्रसिद्ध कृशणा ते कुलदीप यादव क्रीज़ पर हे। श्रंखला दा दुआ ते खीरी टेस्ट मैच 23 अगस्त गी कोलंबो च खेड्ढेया जाहग।

<><><><><><>